

近代中國史料叢刊分類選輯

沈雲龍教授選編

乙集：遺書・政書・遺集類

楊勇慤公（岳斌）遺集

楊岳斌著

文海出版社

有限公司
印行

楊勇懿公

遺集首卷

光緒二十一年冬
十一月問竹軒刊

楊勇慤公遺集卷首目錄

上諭

諭賜祭文

御製碑文

國史本傳

湖南巡撫代遞遺摺疏

閩浙總督查明事蹟疏

並摺略

神道碑

奏議長江圖說

雜著詩稿副刻

光緒十六年八月二十八日內閣奉

上諭前任陝甘總督楊岳斌忠勇性成勲勞卓著咸豐初年隨同前大學士曾國藩剿辦髮逆創立師船由湖北安徽江西直達江甯肅清江面數千里厥功甚偉同治三年克復江甯省城蒙

穆宗毅皇帝眷念勲勤賞給一等輕車都尉並賞加太子少保銜復由福建提督簡授陝甘總督嗣因親老准其回籍終養朕御極後命巡閱長江水師上年服闋後奏准在籍養病方冀調理就痊長資倚

昇茲聞溘逝軫惜殊深楊岳斌著追贈太子太保
銜照總督例賜卹任內一切處分悉予開復應得
卹典該衙門察例具奏加恩予諡並於立功省分
建立專祠其生平戰功事蹟宣付史館立傳伊子
附生楊潛儀著賞給舉人准其一體會試伊孫候
選縣丞楊鎮榮著以知縣用楊道瀼俟及歲時由
吏部帶領引見用示篤念蓋臣至意欽此

諭賜祭文

朕維經文緯武鼎鐘銘不朽之勳崇德報功俎豆
重惟馨之祀緬成勞於在昔悼切騎箕頒曠典以
飾終恩隆奠斁爾原任陝甘總督楊岳斌素懷忠
勇深曉韜鈴慷慨請纓夙奮乘風之志馳驅捧檄
常深誓日之情踐矢石以奏功簡心久在建旌旄
而作鎮方面頻膺勇著虎頭旂常錫號輝生雀羽
冠冕增榮提魚麗之兵專閫曾兼乎水陸靖鷗張
之寇建瓴直駛乎帆檣仗忠信以涉波濤心忘履

險執干戈而衛社稷志切同仇扶大局於東南帶
礪重河山之誓制全軍於西北旌旗揚關隴之威
兵揮九地九天常操勝算名繼一韓一范卓著英
聲祇因從事奔馳莫遂承歡之願用是加恩體恤
俾伸終養之私許奎密之陳情孝思克慰起廉頗
而爲將偉烈彌彰方期歲月舒長湛露永承楓陛
豈意風雲黯淡大星遽隕粉鄉軫念勤勞良深悼
惜旣悉蠲乎往咎仍延賞於後昆於戲靈爽常存
聽鼓鼙而增感哀榮具備奠秬鬯以流芳惟爾精

誠歆茲芬苾

御製碑文

朕惟芳流彤史特彰百戰之功實紀青珉用播千秋之美酬勲勞之卓著生前已厯崇階示恩禮之優隆身後宜加異數爰申異命永勒豐碑爾前任陝甘總督楊岳斌壯志軒昂英姿颯爽仗從戎之策能發能收揮克敵之戈同仇同澤立勲閫外屢晉頭銜錫命行閒頻邀心簡殊榮渥沛飄翠羽以揚輝顯號優加本丹心而有勇坐鎮貔貅之隊節建鄖襄迭提鵝鸛之軍威行漢沔中流擊楫矢志

澄清大纛臨江師勤訓練等狄青之起卒伍早揚
銅面之威比王濬之下樓船竟建石頭之績三湘
七澤烽燧無驚楚水吳山櫓槍盡埽旣告功於北
闕襲世職以增榮復受任於西陲制雄軍而奮武
嗣以馳驅敵愾屢奏鷹揚定省縈懷乞伸烏哺白
華笙譜已安將母之心綠野堂開仍擁閱兵之節
方謂桑榆日永倚畀長資何期帷幄風饗淪殂遽
告朕軫懷宿將篤念耆年用延賞世之恩兼賁易
名之典謚之勇懋嘉爾勲猷於戲虎奮如生浩氣

壯風雲之色螭盤永耀溫綸爭日月之光特錫寵
揚俾昭來許

國史本傳

楊岳斌原名載福湖南善化人原籍乾州廳祖勝儒從勦乾州苗匪在永綏王瓜寨殉節父秀貴直隸宣化鎮遊擊載福幼嫻騎射道光二十六年由行伍補長沙協左營外委二十九年新甯匪首李沅發就擒載福在事出力

賞戴藍翎咸豐二年粵匪竄湖南載福守湘陰有功升宜章營千總三年在籍侍郎曾國藩督辦團練治水師於衡州調載福領右營四年四月偕生